



**Äntwert vum Här Minister fir sozial Sécherheet op d'parlamentaresch Fro n°6056 vum 11. Abrëll 2022 vum Här Deputéierten Sven Clement iwwert de Conseil arbitral de la sécurité sociale (CASS)**

1. Baséierend op den Zuele vun de leschten 3 Joer:

- Wéi vill Dossiere goufe pro Joer vum CASS opgemaach?

An de Joren 2019 bis 2021 goufen am Ganze 5.501 nei Recourse beim CASS eragereecht, dovun 2.056 am Joer 2019, 1.716 am Joer 2020 an 1.729 d'läscht Joer. An där selwechter Zäitspan sinn 10.500 Affäre fir Plädoyer an Audiance fixéiert ginn, dovun 3.405 am Joer 2019, 2.678 am Joer 2020 a 4.417 am Joer 2021.

- Wéi vill Casë goufe pro Joer vum CASS ofgeschloss?

Am Ganzen si fir déi gefrote Jore 4.430 Affären (2019 :1.337, 2020: 1.298 an 2021: 1.795) mat engem Jugement ofgeschloss ginn, woubäi et de betraffene Persounen awer nach ëmmer méiglech war an de besote Fäll virum Conseil supérieur de la sécurité sociale (CSSS) an Appell ze goen.

- Wat war den duerchschnëttleche Montant, ëm déi et an den traitéierten Affär gaangen ass?

Et sief ze bemierken, dass de CASS eng Villzuel vu Recourse géint Decisioune vu ville verschiddene Sozialversécherungsorganismen traitéiert :

- Decisioune vum Verwaltungsrot vun der Associatioun vun der Onfallversécherung (AAA);
- Decisioune vum Verwaltungsrot vun der Pensiounskeess (CNAP);
- Decisioune vum Verwaltungsrot vun der Gesondheetskeess (CNS);
- Decisioune vum Verwaltungsrot vun der Zukunftskeess (CAE);
- Decisioune vum Direktiounscomité vum nationale Solidaritétisfong (FNS) ;
- Decisioune vun der *Commission spéciale de réexamen de l'Agence pour le développement de l'emploi* ;
- Decisioune vun der *Commission mixte* betreffend d'Persounen déi hir läscht Aarbecht net méi konnten ausféieren (reclassement interne/externe);
- Decisioune vun der *Commission de surveillance* (Artikelen 72, 72bis, 73 et 73bis vum Code vun der sozialer Sécherheet).

Den Objet vun de genannte Recourse beleeft sech op d'Ofstreide vun de getraffenen Decisioune op Basis vun hirem Prinzip, dat heescht zum Beispill den Zousproch oder de Refus fir d'Invalidepensioun, d'Kontestatioun vum Prozentsaz vun der Aarbechtsonfäegkeet déi vun der AAA am Fall vun engem Aarbechtsaccident festgehale gëtt oder och d'Decisioun vum FNS am Zesummenhang mam Zousproch, der Ofso oder dem zukünftegen Enthale vum REVIS (*revenu d'inclusion sociale*).

Dëst bréngt mat sech dass et net méiglech ass en duerchschnëttlechen an zoutreffende Montant fir déi betreffend Affären ze nennen.

Wat d'Affäre vun der *Commission de surveillance* ugeet, traitéiert de CASS d'Affären an Zesummenhang mat den Aktivitéitsrapporte vun den Dokter an den Zännokteren, souwéi och d'Violatioune vun de gesetzlechen, reglementareschen, statutareshen a konventionelle Bestëmmungen duerch en Prestataire du Gesondheetsleeschunge vun der zoutreffender Gesetzgebung. An deene Fäll muss de CASS sech ëm d'Analys vum Dossier vum Prestataire këmmere a bei Feststellung vun engem Verstouss eng Sanktioun géint dësen ausschwätzen. Den Artikel 73bis, 1. Alinea, vum Code vun der sozialer Sécherheet gesäit folgend Sanktioune vir:

«[...]

a) *une amende d'ordre au profit de la CNS ne pouvant dépasser 25.000 €. En cas de récidive dans un délai de deux ans l'amende d'ordre ne peut être inférieure à 25.000 € ni supérieure à 500.000 € ;*

b) *la restitution, à la CNS, des montants indûment perçus augmentés des intérêts légaux ;*

c) *la soumission obligatoire et exclusive, pendant une période de cinq ans au plus, du prestataire au régime conventionnel prévoyant une prise en charge directe par la CNS de toutes les prestations effectuées pour compte des assurés ;*

d) *la limitation du nombre d'actes et de services professionnels par patient en moyenne que le prestataire ne peut plus dépasser pendant une période de trois années au plus sous peine de restitution des honoraires afférents. Ce maximum peut s'appliquer à tout ou partie de l'activité du prestataire. »*

– *Wéi oft gouf am Sënn vum Versécherten, wéi oft am Sënn vum Versécherer tranchéiert?*

An de Joren 2019 bis 2021 sinn 1.350 Recoursen als fondéiert deklariéiert ginn, wouvun et der 404 am Joer 2019, 419 am Joer 2020 a 527 am Joer 2021 waren. An där selwechter Zäitspan goufen 2.727 Recoursen als net fondéiert befonnt. Dës Weideren ass ze soen dass 256 Recoursen als irrecevabel erkläert goufen, respektiv vum Rôle gestrach goufen. (86 am Joer 2019, 57 am Joer 2020 an 113 am Joer 2021).

*2. Wëssend, dass Delaie jee no Cas kënnen variéieren, wéi vill Zäit vergeet duerchschnëttlech vun der Demande de Recours bis hin zum éischten Debat?*

Generell läit den Delai tëscht dem Depot vum Recours beim CASS bis hin zur éischter Fixatioun vun enger Unhéierung tëschent dräi a sechs Méint.

*3. Wéi vill Zäit vergeet duerchschnëttlech vun der Demande de Recours bis hin zur Decisioun?*

Soubal festgeluecht ass dass d'Affär ka plädéiert ginn, gëtt se vum CASS a Präsens vun de betraffene Partie gehéiert an ënner Berodung geholl. D'Ausschwätze vum Urteel ass normalerweis op véier bis fënnf Woche fixéiert, mat Ausnam vun de juristeschen méi komplexen Affären am Zesummenhang mat der europäescher Gesetzgebung.

Et muss een awer ervirhiewen dat bei ganz villen Affären den Datum fir d'Plaidéiere op Demande vun de Parteien hin, an haaptsächlech vun de Parteien déi de Recours ugefrot hunn, verréckelt gëtt fir dass nach weider medezinesch oder och aner dozougehéierend Dokumenter kënne virgeluecht ginn.

De CASS kann ee bis zwee mol den Accord fir d'Verleeë vun der Audienz ginn, ma kann awer och décidéieren no e puer Ufroen en Datum festzeleeën, dee net méi ka verréckelt ginn an op deem d'Affär muss plaidéiert ginn a wann néideg dann och *par défaut* géintiwwer enger vun de Parteien.

4. Konnten opgrond vun den am Artikel ugeschwate Capacitéitserhéijunge schonn Entlaaschtunge festgestallt ginn? Wa jo, wéi manifestéieren sech dës?

Doduerch dass tëscht de Joren 2014 an 2021, d'Unzuel vun de Jugen, de Greffieren an de Mataarbechter an d'Luucht gaangen ass an de CASS am August 2020 a seng nei Raimlechkeeten am Gebai "Moonlight" geplënnert ass wou dem CASS een Audienzsaal méi zur Verfügung steet (et stinn elo 3 Säll zur Verfügung), kënne méi Audienze wéi soss vun de verschiddene Jugë gehale ginn. Dëst bréngt mat sech dass Entlaaschtunge festgestallt kënne ginn an de CASS nach oppen Affären no a no opschaffe kann an domat och de Réckstand vun den Affäre reduzéiere kann.

Lëtzebuerg, den 16. Mee 2022

De Minister fir sozial Sécherheet

(s.) Claude Haagen